

希澹園詩集

卷之四

二

詳校官編修_臣翟槐

中書_臣劉源溥履勘

覆校官庶吉士臣毛鳳儀

校對官中書臣袁文邵

謄錄監生臣趙鳴臯

欽定四庫全書

希澹園詩集卷三

明 虞堪 撰

近體七言

汗漫遊與姚子靜錢公權壁上人同賦

我亦身從汗漫遊
逍遙海上覓玄洲
徧探龍藏三千界
一駐鸞笙五百秋
不用靄槎通絕域
底須神駿蹴崑丘
臭帑即是人間世
誰共蜉蝣樂未休

吳伯常家看桃花

二月一日走海涯吳生邀我看桃花重尋玄都定何日
且看赤城俱是霞此番開顏阿母喜他年得子小兒誇
蜂衙蜚陣渾擾擾何處春來有汝家

山家看花

折得山前數樣花瓦餅隨意貯山家

一作亂插
置山家

香霑昨

夜三更雨紅帶朝陽五色霞不用熏籠蒙獸錦絕勝肌
玉護蟬紗長安道上風塵暗把酒看春又歎嗟

震澤

汪洋巨澤控三吳不為黃池入版圖大禹功成遺鼎在
夫差侈極故臺無淵靈尚護龍潛窟國色纔銷鹿卧蕪
神物在川輝日月生民終古樂涵煦

拜郊臺

臺遺址在
越來溪上

吳王城外拜郊臺山色湖光共繞迴終古翠華隨水去
何年玉牒為天開斜陽一笛牛羊下細雨千帆雲鳥來
忠死佞存墮霸業登臨不盡客興哀

望湖亭

望湖亭子橫山半水色山光落檻前前輩風流今已矣
野人登眺獨悽然鶴鳴華表誰同聽犬上東門莫自牽
謾把一杯消客恨五湖何事別乘船

闔廬浦

闔廬浦口畫船開興逐秋潮海上回霜樹露花紅窈窕
梵宮仙觀碧崔嵬南飛越鳥雙雙過北帶吳山隱隱來
欲把一盃觀浩蕩乘風檣舵苦相催

陳湖

渺渺洪流接具區由來畊鑿捲膏腴沈淪為有魚龍混
開廓豈無鴻鴈俱好覓根源隨博望莫將清淺問麻姑
桑田變海元如此自汎扁舟入五湖

嘉興水西寺

宣城水西不可到秀州水西今獨遊太白才情真放逸
牧之人物更風流諸天問法元無相千載題詩在上頭
人世古今同一夢劫灰煙暝五湖秋

山家書壁

為愛山家人跡稀往來渾覺市廛非雷鳴谷裏朝尋菌
雨過巖前日採薇草澤底須人自棄桃源真與世相違
他年未必無園綺應是看雲到晚歸

山家書壁遺老農

老農政喜黃梅雨笑我何妨白晝眠竹逕鳥啼泥滑滑
稻畦蛙叫鼓闐闐開溝放水將鋤去過嶺看雲借屐穿
性僻自嫌多懶散空吟未遂卜居篇

登穹窿山訪張萊二道士

穹窿絕頂訪仙居
燕坐高人石不如
一點紅爐飛白雪
大千碧海掣金魚
坐看日月渾淪轉
笑指華夷寥廓虛
我亦飄飄生羽翰
不奔塵世五侯車

書陶孝子傳後

常州城陷民陶某父為賊驅去及官軍復克城父死
不知其所某於寓近營冢壙葬父冠裳旦暮哭臨故
人序其孝云

天兵自昔下宋時
常州之民皆死之
百年政爾勞生息

一日猶然逢亂離妖氛易滅不足數玉石俱焚良可悲
北門陶家有新塚子孝親冤難汝為

旅懷

野閣篝燈獨夜時苦愁風雨失歸期夢回蜀道關山險
行盡江南草木衰縱酒為憐花落去懶眠重恨月來遲
不知鳴鳳飛何處老却梧桐第一枝

春興

十日寒風剪落梅東西撩亂雪盈堆王孫何處尋芳艸

野老多情立舊苔
頓覺繁華隨水去
斷無行跡過橋來
黃昏寂寞徘徊久
安得清樽為爾開

謾興

眼中風景非前日
門外桑田是幾年
北去黃河猶滾滾
南飛烏鵲自翩翩
於今虎帳聞鼙鼓
何處龍舟奏管弦
濁酒一盃難強醉
默看芳草憶春前

聽朱秉中鼓琴

潮落滄江月上時
衡門獨客正棲遲
彈琴猶有絃中散

對榻可無鍾子期
蝴蝶翩翩迷曉夢
松風颯颯起秋思
水雲別轉瀟湘曲
白露無聲下竹枝

八月十五夜對月寫懷

月色且看今夜好
砧聲不斷若為情
聯綿烽火近或遠
阻絕兵戈縱復橫
赤壁煙銷非昨夢
黃河天近幾時清
如今搖落重寥寂
華髮催人兩鬢生

中秋夜與堅上人看月

圓通寺裏看秋月
十五潮頭送夜明
龍喜金光搖海藏

鵲驚樹影弄天泓祇知世界無昏昧不信風雲有變更
詩句已成禪印悟忽聽樓上打鐘聲

江渚移居

柴關臨水野人居思滿滄洲老釣漁落木兩山秋色遠
淡煙孤鳥晚晴初底非江左袁宏渚可是隆中葛亮廬
故舊幾人同笑傲兵塵十載謾躊躇

山中獨夜有懷江上故人

三更風露翻衾薄萬壑松濤到枕繁江上故人寧隱豹

山中獨客正聽猿
蘭煙賸馥烏皮几
燭影搖紅白玉樽
月色灘聲誰寂寞
思君清氣滿乾坤

漁船早起次韻

舟泊蘆花雪滿窓
曉鐘煙寺已微撞
雞啼草屋星垂地
鴉散楓林月墮江
拙計祇甘持釣去
閑心何必豎旂降
起來驚破沙鷗夢
飛度前汀又一雙

雨中過同川訪王性中齋居寓宿話舊

天時人事底推遷
一別俄經二十年
華屋幾空玄鳥計

滄江重對白鷗眠
前程擾擾三義路
往事滔滔百道川
共語平生夜來雨
故人高榻未虛懸

午日訪沈元圭席上次黃舜臣所賦詩韻

一簾葵錦爛晴霞
五色絲虹映臂紗
玄藥自消頭上雪
絳榴誰插鬢邊花
茶烹石鼎從施禁
詩寫蠻牋學破邪
不是西山黃石叟
難尋東老地仙家

宿黎里普濟院書壁懷南邦長老

空花室裏聽清秋
身世俱忘得自由
風雨蕭條來北竇